



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-318

06/04/2020

ქ. თბილისი

მარნეულის მუნიციპალიტეტში, სოფ. აზიზქენდში ფ/პ ვუგარ გიუმაევის სარწყავი (სამელიორაციო) სისტემის მოწყობა-ექსპლუატაციაზე სკრინინგის გადაწყვეტილების შესახებ

ფ/პ ვუგარ გიუმაევის მიერ გზშ-ის ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია მარნეულის მუნიციპალიტეტში, სოფ. აზიზქენდში ფ/პ ვუგარ გიუმაევის ერთწლიანი კულტურის მოყვანის მიზნით სარწყავი (სამელიორაციო) სისტემის მოწყობა-ექსპლუატაციის სკრინინგის განცხადება.

წარმოდგენილი დოკუმენტაციით დგინდება, რომ ერთწლიანი კულტურის მოყვანა იგეგმება მარნეულის მუნიციპალიტეტში, სოფ. აზიზქენდში ფ/პ ვუგარ გიუმაევის საკუთრებაში არსებულ სასოფლო-სამეურნეო დანიშნულების მიწის ნაკვეთზე. ნაკვეთის ფართობი ჯამში შეადგენს 45622 მ² (საკადასტრო კოდი 83.03.16.933; 83.03.16.934). სკრინინგის განცხადების თანახმად ფ/პ ვუგარ გიუმაევის საკუთრებაში აქვს ასევე არასასოფლო-სამეურნეო დანიშნულების 500 მ² მიწის ნაკვეთი (საკადასტრო კოდი 83.03.10.764), სადაც დაგეგმილი აქვს არსებული (უმოქმედო, მწყობრიდან გამოსული) სატუმბო სადგურის აღდგენა და სარწყავი სისტემის მოწყობა. დაგეგმილი სატუმბო სადგურის ტერიტორიიდან უახლოესი საცხოვრებელი სახლი მდებარეობს დაახლოებით 65 მეტრში.

სკრინინგის განცხადების თანახმად, ფ/პ ვუგარ გიუმაევის ერთწლიანი კულტურის წყალმომარაგების მიზნით, დაგეგმილი აქვს წყლის აღება მდ. ალგეთიდან. წყლის აღების GPS კოორდინატებია: X-0496544 Y-4585499.

სკრინინგის განცხადების მიხედვით, სატუმბო სადგური მოსარწყავი მიწის ნაკვეთიდან დაშორებულია დაახლოებით 1000 მეტრით. დაგეგმილია მდ. ალგეთიდან მილით წყლის მიწოდება ჩამქრობ ჭაზე, რომელიც მოთავსებულია ამჟამად უმოქმედო 9 აპრილის სახელობის მაგისტრალურ არხში. მაგისტრალური არხიდან წყალი თვითდინებით მიეწოდება მოსარწყავ ნაკვეთებს, არსებული გამშვების საშუალებებით. ფ/პ ვუგარ გიუმაევის მიერ წლის განმავლობაში მოსარწყავად გამოყენებული იქნება 1250 მ³ წყალი.

სარწყავი სისტემის მოწყობის მიზნით გამოყენებული იქნება 200 მ სიგრძის და 273 მმ დამეტრის ლითონის მილი, ასევე 1 ცალი 4 მ³/სთ წარმადობის ტუმბო მდინარიდან წყლის ამოსატუმბად.

წარმოდგენილი სკრინინგის განცხადების თანახმად, ტუმბო იმუშავებს ელექტროენერგიაზე, რისთვისაც დაიდგმება 250 კვ-იანი ტრანსფორმატორი, რომელსაც ხელშეკრულების საფუძველზე დაამონტაჟებს შესაბამისი უფლებამოსილების მქონე კომპანია, ზემოაღნიშნული ტუმბო დღეში მოიხმარს 100 კვტ ელექტროენერგიას.

სარწყავი მილის განთავსება იგეგმება მიწის ზედაპირზე, შესაბამისად თხრილის გაჭრა არ არის დაგეგმილი. მილის განთავსების ტერიტორია სრულად განეკუთვნება ადგილობრივ თვითმართველობას და სამუშაოების დაწყებამდე შეთანხმდება ადგილობრივ მუნიციპალიტეტთან.

ვინაიდან პროექტის ფარგლებში სარწყავი მილის მიწაში ჩადება და თხრილის გაჭრა არ არის გათვალისწინებული, შესაბამისად სამელიორაციო სისტემის მოწყობის პროცესში სპეცტექნიკის გამოყენება (რამაც შესაძლოა გამოიწვიოს ნიადაგის დაბინძურება საწვავით და საპოხი მასალებით) არ მოხდება. ყოველივე ზემოაღნიშნულიდან გამომდინარე, ზემოქმედება ნიადაგის ნაყოფიერ ფენაზე და გრუნტის ხარისხზე მოსალოდნელი არ არის.

საქმიანობის სპეციფიკიდან გამომდინარე, სარწყავი სისტემის როგორც, მოწყობის აგრეთვე ექსპლუატაციის ეტაპზე ზემოქმედება ატმოსფერულ ჰაერზე მოსალოდნელი არ არის.

ექსპლუატაციის ეტაპზე, ხმაურის წყაროს წარმოდგენს წყლის ტუმბო, რომლის სიმძლავრის გათვალისწინებით, ხმაურით გამოწვეული ზემოქმედება არ იქნება მნიშვნელოვანი.

საპროექტო ტერიტორია თავისუფალია მცენარეული საფარისგან და შესაბამისად ზემოქმედება ამ კუთხით არ არის მოსალოდნელი.

სარწყავი სისტემის მოწყობის დროს სახიფათო და არასახიფათო ნარჩენების წარმოქმნას ადგილი არ ექნება.

სკრინინგის განცხადების თანახმად, ვიზუალური შეფასებით, ტერიტორიაზე ისტორიულ-კულტურული მემკვიდრეობის ძეგლები არ ფიქსირდება.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და მარნეულის მუნიციპალიტეტის მერიის საინფორმაციო დაფაზე, საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

დაგეგმილი საქმიანობის სპეციფიკიდან და ყოველივე ზემოაღნიშნულიდან გამომდინარე, სარწყავი (სამელიორაციო) სისტემის მოწყობა და ექსპლუატაცია არ არის დაკავშირებული გარემოზე მნიშვნელოვან ზემოქმედებასთან.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილის, ამავე კოდექსის II დანართის პირველი პუნქტის 1.3 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ მარნეულის მუნიციპალიტეტში, სოფ. აზიზქენდში ფ/პ ვუგარ გიუმაევის სარწყავი (სამელიორაციო) სისტემის მოწყობა-ექსპლუატაცია არ დაექვემდებაროს გარემოზე ზემოქმედების შეფასებას;
2. ფ/პ ვუგარ გიუმაევი ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი რეგლამენტით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს ფ/პ ვუგარ გიუმაევის;
4. ბრძანება ძალაში შევიდეს ფ/პ ვუგარ გიუმაევის მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში გადაწყვეტილება განთავსდეს სამინისტროს ოფიციალურ ვებგვერდზე და მარნეულის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი